

趙松雪全集

王桐題



卷之八

八

卷之八

八

卷之八

八

卷之八

八

卷之八

趙文敏公松雪齋全集 卷二

海上 後學 曹 培廉 敬三 校

五言古詩

古風十首

詩亡春秋作仲尼蓋苦心空言恐難託指事著以深大義炳如日萬古仰照臨
鳳鳥久不至楚狂乃知音愁來不得語起坐彈吾琴

周衰有戰國紛紛極荆秦黃金聘辯士駟馬迎從人朝為刻骨讐莫作敵血親
終然智力屈奉身俱入秦

相如賦大人出語頗奇怪飄然凌雲意過耳誠一快誇言入無際自覺塵俗隘
安知翻成勸何用名為戒

自有天地來蓬萊幾清淺人生空曠首舉世誰得見瑤臺在何許渺渺烟波遠
方舟不可渡使我空展轉

絕代有佳人被服綺與羅蛾眉秀聯娟吐詞馥若蘭清歌啟皓齒瑤琴發哀彈
一彈再三歎聽者涕沈瀾借問誰家子為言本邯鄲

秋風吹庭樹故葉紛以隊明月耿夜長草蟲促經緯四序苦不淹少壯何足貴
展轉復展轉寤辟不能寐肯為閨中秀今作市門鄙豈無膏與沐甘心得憔悴
山深多悲風日莫愁我心玄雲降寒雨松柏自哀吟人生百年後奄然閱重陰
念此每不樂天路何由尋仙人倥傯輩消搖在青岑奈何不爾思委命重黃金
海山有奇樹粲粲珊瑚枝由來植物性無脛可推移如何石氏子樹之白玉墀
洛陽經幾戰金谷久荒夸空令千載下聞者為傷悲

烈風號枯條落葉滿周道原野何蕭索川流亦浩浩離居日以遠懷思令人老
功名會有時生世苦不早顧瞻靡所騁憂心慙如擣

浮雲何方來不知竟安之飄颻隨風去汗漫以為期自首功名士往往事驅馳
白駒空谷中誰能如繫維皎皎難見容翻受世妍媸虛名誠無益不見斗與箕

有所思

思與君別來幾見芙蓉花盈盈秋水若在天一涯欲涉不得去茫茫足烟霧
汀洲多芳草何心采蘅杜青鳥翔雲間錦書何時還君心雖匪石祇恐凋朱顏
朱顏不可仗那能不惆悵何如雙翡翠飛去蘭苕上

和子俊感秋五首

秋至倏廿日天宇豁然清涼颯旦夕至林木發商聲良辰不我與慨然心自驚
古人久已逝念之動中情苦心嬰世患只博身後名今我將無同庶復得此生
明月照北林翩翩棲鳥翻虛室當靜夜幸絕人事喧念子已獨寐無人相與言
吾生性坦率與世無競奔空懷邱壑志耿耿固長存何由持此意往與巖鄭論
披衣步中庭仰視河漢白寓形天地內聊復度朝夕仲尼諒非愚皇皇不暖席
履運有異同喟然慨今昔邱園豈云遠終當期屏迹日月馳驚去鳥影飛過隙
歸林盍不早胡為受形役

晴雲曖高宇輕颺弄微涼天氣政爾佳撫已徒自傷今日非昨日任再歎流光
幾見春鳥鳴已復啼寒蟬一時良亦短萬世則為長

白露泫然隊草木日以凋閒居無塵雜日薄風脩脩登高爲我心葵扇欲罷搖
感時俯逝水回睇仰層霄松喬在何許高蹈不可招願言從之遊懷古一何遙

詠懷六首

皇天分四序寒暑互推移如何當秋夕愴怵令心悲寒蟬寂無聲翔雁紛南飛

西風一披拂草木失華滋不惜鷓鴣鳴但傷衆芳萎徘徊白露下鬱悒誰能知
美人涉江來遺我雲和琴朱絲絀玉軫古意一何深長歌和清彈三歎有遺音
逸响隨風發高高不可尋奈何俚俗耳折楊悅哀淫此道棄捐久沉吟獨傷心
明明秋夜月流光照羅帷隱憂從中來起視夜何其草蟲催杆軸扎扎鳴聲悲
良人遠行役萬里歸無期予髮已曲局膏沐久不施回身入閨房愁思當告誰
獨有中宵夢遙遙為君馳

蒼天高無極大川廣且深下有沉潛魚上有溟飛禽先民莫不逸我獨懷苦心
抒情作好歌歌竟意難任

陵苕何青青上蒙松與柏一時良亦好歲晚竟誰得人無金石壽生年不盈百
何為慕榮祿抱此長戚戚

菽粟在中原夫人能采之無為思百憂歡樂當及時今日忽已過來日非所知
有酒且復飲既醉歌令儀

詠逸民十一首

自古逸民多矣意之所至率然
成詠聊與同好時而歌之耳

鳳凰覽德輝奮翅翔千仞矯矯孤竹子求仁斯得仁於心有不厭視世等埃塵
俯仰志不屈又不辱其身聖言一以宣萬古無緇磷誰言首陽山卓與嵩華鄰
采采山中薇媿爾肉食人

勞生本非情祿仕吾不苟古來畎畝間亦有沮溺叟依依耦耕心千載思尚友
中道世所難狂狷誠足取如何絕代下相知不忠厚仲尼不復作斯懷向誰道
駟車秣鷲馬吾將適齊國聞有魯連子傲儻好奇畫一談秦師走再說聊城拔
功成不受賞高舉振六翩布衣終其身豈復為世役茫茫千載遠安往訪遺跡
躊躇東海上向風長太息

四時相代謝榮耀何足恃瓜田引新蔓不見桃與李知士解其會遇坎當復止
邵生故秦吏乃亦睹茲理賢哉感我懷三歎不能已

于真初亦仕歲晚乃逃之區區南昌尉上疏忘其卑忠言不見用耿耿當告誰
飄然棄妻子終身與世辭抱關甘貧賤所貴莫我知至今九江墳清風激羣黎
神仙信茫昧此士獨不疑孤雲無定在逝水何時歸遐思一矯首張望無由期
悠悠空山雲泱泱長江流廊廟意不屑山澤聊淹留故人在天位高步追巢由

木亭齋全集 卷二
三
豈曰子無衣辛苦被羊裘東京多節義之子乃其尤窮居雖獨善輔世豈不優
汪汪千頃波不為人濁清道周言行表蕩然無得名誰言牛醫兒乃是人中英
當時無間言後世流德聲思之不可見使我鄙吝萌淳風久已漓此意豈復存
特無君子者雖賢寧見稱

南州有高士食力事耕稼優游聊卒歲不矯亦不隘大木行欲顛絳纜豈足賴
何為諸老翁棲棲不遑舍斯言非所見明哲自高邁誰能懸一榻待子來稅駕
鹿門何亭亭下有辟世賢鳳鷗隱林中卧龍蟠其淵一朝起高翔斯人獨深潛
功名不可為我志久已安一聞耆舊傳使我心悠然

黃鵠羽翼長一舉思千里幼安本中原乘桴走東海舉世方尚同遠引存吾志
流風漸異俗敦禮化鄰鄙子魚平生友胡乃不相委

塵事非所便田園久見招歸來三逕中蔚蔚長蓬蒿雖有荷鉏倦濁酒且自陶
茫茫大化中委運將焉逃唐虞去已遠由來非一朝粲粲霜中菊采采忘其勞

歲莫和剛父雜詩四首

窮陰結嚴寒玄景閱微陽蘭蕭同憔悴隱惻我中腸美人彈玉琴繼之歌清商

經急聲未已知子意獨長陽春時已至此曲徒悲傷

美玉處荆山林木生光輝采之獻凡目棄置亦其宜如何和氏于涕泣有餘悲
古來賢達人不知毀譽移被褐懷至寶孟懼不我知待賈未能信韞藏誠可師
驚飈吹白日流光忽蹉蛇登山采衆芳荆秦一何多迷途幸未遠回車且委蛇
黃鵠志四海雀鷄將如何

肥馬黃金鞍輕裘華且鮮
謁來從橫馳意氣何翩翩
朝為人所慕夕已為世憐
此道固應爾禍福非虛言
生當稱善人死當謚為賢
勿羨夸毗子狂馳終百年

贈道隆上人

辟俗無所之步尋招提遊類垣蔽蓬艾破屋壞不脩老僧俗念淨靜坐百不憂
浮雲有逸態止水無急流乃知我輩人苦受世累囚
謁來得此地稍覺心休休
窗前幾聚菊青蕊亦已稠
愛之不忍采留作山房
秋何當移四松伴汝成清幽
南岡與北嶺路近頗易求
他年風雨夜來聽龍吟愁

遊南山憇山下人家和人韻

驅馬南山陽下馬望絕巖
解衣坐盤桓言就蓬廬偃
非無攀援力興盡自應返

天高曠風息木落歲華晚勢阻之遐觀趣得心自遠不有君子詞何用行繾綣

東郊

晨興理孤榜薄言東郊遊清風吹我衣入袂寒颼颼幽花媚時節弱將依寒流
山開碧雲歛日出白烟收曠望得所懷欣然消我憂中流望城郭蔥蔥佳氣稠
人生亦已懸惠養要須周約身不願餘尚恐之所未求且當置勿念乘化終歸休
春後多陰偶成三首用復無逸來貺

日出晨景澹散髮步中庭仰見濯濯柳春風暢人情茲晨豈不佳誰能定陰晴
人生亦良脆疲勞竟何營萬事可撥遣舍道焉求成
卧起向北窗一室可棲遲取詩三百篇一一絃歌之古道豈為遠先師不吾欺
嘉我有良朋所志共在茲適意聊娛樂過此非所知

仲春忽已過四序隨流波水深不可厲苦雨一何多田園頗在念春事今如何
沉憂亦無益言笑復言歌

曉起川上贈友

明發不能寐獨步柳陰中秋色方浩蕩晨光乍曛曛爍爍川上日蕭蕭樹間風

葛巾欲吹墮，纈締已無功。感彼歲月駛，悟此人世空。悠悠竟何補，山林情所鍾。終期抗高志，駕言從赤松。

遊弁山

我欲到斯境，歲月良已深。今晨為茲遊，疇我夙甘心。悠悠岡坂長，慘慘風雲陰。微雨迫短日，飄然洒衣襟。婁欲還吾駕，去意復難任。逍遙得所止，林竹自蕭森。素琴不須彈，山水有清音。邈在樊籠外，塵想何由侵。况懷冥絕理，去此將焉尋。他山豈不好，聊爾非所欽。

二月二日尊經閣望郊外山水二首

朝登西北樓，遐景舒我懷。熹微晨光動，窈窕春增華。草木罕悴色，山川一何佳。悠然斜川意，千載與我諧。及茲春服成，言詠樂無涯。此理將不泯，棄之良可嗟。日出羣動作，雞犬亦復喧。渺渺孤舟發，翩翩棲鳥遷。先師有明訓，政在善利閒。結髮事詩書，於今益可憐。况茲去古遠，淳風未易還。吾行亦聊爾，一覽可忘言。

四慕詩和錢舜舉韻

予昔有高志，悠然舞雩春。接輿諒非狂，行歌歸隱淪。周也實曠士，天地視一身。

去之千載下淵明亦其人歸來北窗裏勢屈道自伸仕止固有時四子乃不泥
九原如可作執鞭良所欣

春思

春柳黃如鶯春風揚綠波美人在何許忽若阻山阿攀條弄白日常恐歲蹉跎
懷思鬱不舒佳期將奈何良辰難驟得臨風空浩歌

雜詩

四時更代謝物化常隨之春華曾幾何歲月忽如茲嚴風動高林百草具已萎
人生況有沒憂患乃其宜棄捐勿復念出入由化機安得松喬術邈與世相違
寄題右之此靜軒

卜居無喧寂尚論心所宗山林苟不靜亦與朝市同聞君南窗下寄傲樂無窮
曲肱有餘趣戰勝紛華中好風從何來吹子庭前松清琴時一彈濁酒尊不空
頗恨道里賒不得往相從人事矧好乖我心何時降

簾山曉行

曳杖行墟曲蒼茫曉色分凝霜被原隰葛屨非昔聞新松夾道周宿草冒高墳

日月送而逝，死生安足云。輕舟泐寒流，悵望廉山雲。世固不可辟，斯人本同羣。緬焉心如結，詠言著斯文。

奉和本齋先生首夏即事

天道雖不言，坐覺四時行。藹藹庭前陰，燠燠枝上榮。閒居有真趣，曲肱寄餘情。仰視浮雲翔，俯聆時鳥鳴。道勝心自怡，松喬可齊齡。惜哉無旨酒，為公稱兕觥。

贈趙虞卿

客從北方來，逍遙江湖間。顧影空自愛，不見欣戚顏。奕秋去已遠，神觀一朝還。惜無雙白壁，慰子行路難。翩翩雲中鶴，孤高杳難攀。長懷紫霞客，引袂入名山。

題董元溪岸圖

石林何蒼蒼，油雲出其下。山高蔽白日，陰晦復多雨。窈窕溪谷中，遭回入洲渚。冥冥猿狖居，漠漠鳧雁聚。幽居彼誰子，孰與玩芳草。因之一長謠，商聲振林莽。

贈別夾谷公

驅馬原隰間，經時不遑休。首來日在斗，今去麥已秋。王事有埤益，宴安非所求。翩翩晨風翼，一舉迹莫留。誰令匏瓜繫，自懷離別憂。

青青蕙蘭花含英在中林春風不披拂胡能見幽心相去千里餘會合大江
南促席談自古知我一何深此別雖非遠懷思渺難任公其愛體素尚無金
玉音

題舜舉小隱圖

有水清且泚回泐亂石間樂哉三子者在澗歌考槃流波牽弱縷輕颺動
文竿信無吞舟魚我志匪魴鰈勿言隱尚小神情有餘閑高士不可見古
風何時還

趙邨道中

朝出南郭門遙指西山陰馬蹄與石鬪宛轉愁我心溪谷奔回互寒風振
穹林黃葉洒我衣巖泉走哀音淒淒霜露降窮思浩難任人生亦何為百
年成古今華堂昔燕處零落歸邱岑况復不得保悲來淚沾襟

昔年干戈動兵塵暗三吳長江已無險智勇亦難圖築壘依平山謀國一
何愚楨幹羣林空遺址莽邱墟至今蓬蒿下猶有白骨枯天陰萬鬼哭慘
慘荒山隅興亡自有數不敢問何如獨憐野菊花立馬為躊躇

奉酬戴帥初架閣見贈

仙人海上來遺我珊瑚鉤晶光奪凡目奇采耀九州自吾得此寶晝玩夜不休

生世勿恨晚及與斯人儔惜哉無瓊玖可以結綢繆世德日下衰古風向誰求
蛾眉亦何有空受衆女伏通俗固所願違己良足憂感于贈言意再拜涕泗流
安得騎麒麟從子以遠遊

吾愛戴安道隱居絕埃塵彈琴聊自娛書畫又絕倫豈無召我者已矣非所欣
昔我道剡中山川自清新是時夜雪霽懷哉見其人常欲以暇日慷慨為寫真
之子有祖風千里響然臻我從蘇李後敢言筆墨神坐之盤石上俗物不得親
微君動高興此意當誰陳

桐廬道中

歷歷山水郡行行襟袍清雨崖東滄江扁舟此宵征卧聞灘聲壯起見渚烟橫
西風林木淨落日沙水明高旻衆星出東嶺素月生舟于棹歌發含詞感人情
人情苦不遠東山有遺聲豈不懷燕居簡書趣期程優游恐不免驅馳竟何成
我生悠悠者何日遂歸耕

張謩事遂初亭

青山繚神景佳氣溢芳甸林亭去天咫萬狀爭自獻年多嘉木合春晚餘花殿

雕闌留戲蝶藻井語嬌燕退食鳴玉珂友于此終宴鐘鼓樂清時衣冠集羣彦
朝市塵得侵圖書味方遠紛華雖在眼道勝安用戰初心良已遂雅志由此見
何事江海人山林未如願

送周正平學士致仕還里

關吏晨啟門僕夫戒首途祖道京城南喜色動闈閣仕宦非徒榮出處貴合義
公今雖未耄進退有餘地高蹈激流俗清風聳朝廷增秩乃繼祿聖明優老成
逍遙桑梓間年高德彌邵紅顏醉春酒白髮照晴昊兩疏真勇決四皓甘隱淪
漢史不專美古今凡幾人青牛當南遊紫氣已先路我欲強著書懷哉未能去

寄鮮于伯幾

廟廊不乏才江湖多隱淪之子稱吏隱才高非衆鄰脫身軒冕場築屋西湖濱
開軒弄玉琴臨池書練裙雷文絜周鼎鹿鳴娛嘉賓圖書左右列花竹自清新
賦詩凌鮑謝往往絕埃塵我生少寡諧一見夙首親誤落塵罔中四度京華春
澤雉歎畜樊白鷗誰能馴

送陳子充運副之杭州

鹽為生民食日用猶水火雖非飢所急一日無不可但令商賈便那復愁國課
數年人壞法貪欲肆偏頗利多歸私室民始受鹽禍爾來又計口強制及包裹
推酷窮滴漚征商劇遮邏東南民力竭此事非細瑣朝家更政化選擇堪負荷
君為尚書即精白色瑳瑳明當戒行李往理吳越旆祝君無別語編戶要安妥
湖山多勝處亦可供宴坐談笑尊俎間佳聲滿江左

贈茅山梁道士

名山標句曲秀嶺射層雲層雲散浩彩中有三茅君度世三千秋流芳浩無垠
丹光耀朱陽琴心傳王文司命播萬物發蒙導人羣學道得曠士采真遺塵氛
贈我書一編清謠吐奇芬筆耕亦已勤寸田要鋤耘靈臺聳絳闕黃雲覆氤氳
內觀神自照衆言一何紛平生山林意獨往乃所欣攀援桂樹枝米蕒芝蘭薰
靜與木石居遊則侶麋麇松柏無冬夏烟霞自夕昕軒冕或桎梏綺語徒羶葷
大道逕雨朴至哉吾師云冥冥紫霞想湛言久不聞聆我歌洞章判然仙凡分
罪出

在山為遠志出山為小草古語已云然見事苦不早平生獨往願邱壑寄懷抱

圖書時自娛野性期自保誰令墮塵罔宛轉受纏繞首為水上鷗今如籠中鳥
哀鳴誰復顧毛羽日摧槁向非親友贈蔬食常不飽病妻抱弱于遠去萬里道
骨肉生別離邱壠缺拜掃愁深無一語目斷南雲杳慟哭悲風來如何許穹昊

次韻齊彥學士中秋雨後玩月

卧疴媿微官俯仰百憂集安知中秋至但見明月出蕭蕭雨新已涼氣澄霽夕
青旻羅疎星燦若珠與璧小蟲鳴草根萬物皆自適而我獨何為矯首望南北
愁來無端倪撥去終不釋人生莫不樂杯酒會鄰戚高歌雜清唱起舞曼鳴瑟
閉戶且復眠空尊何由酌

秋日錦櫻為繼卿作

灼灼庭下花霜餘發春妍眾卉方具腓穠芳獨嫣然主人遠方來一笑清尊前
植物已無情有開容必先造化寓深意嘉與後人傳

聽姜伯惠父彈琴擊阮

姜子早聞道澹然遺世榮執花有生意焚香無俗情時抱琴與阮彈作松風聲
疇昔江湖間久已知于名安知十年後一笑成合并是邦山水秀照人肌骨清

願于石泉上為鼓一再行因之洗我耳遂欲濯塵纓

題洞陽徐真人萬壑松風圖

謾謾松下風悠悠塵外心以我清淨耳聽此太古音逍遙萬物表不受世故侵
何年從此老辟穀隱雲林

自釋

君子重道義小人貴功名天爵元自尊世紛何足榮乘除有至理此重彼自輕
青松與蔓草物情當細評勿為蔓草蕃願作青松貞

禱雨龍洞山

蒼天如犬牙細路入深谷絕壁千餘仞上有凌雲木陰崖不受日洞穴自成屋
蕭森人跡少蒼蔚獸攸伏雲林互隱映澗道相回復翔禽薄穹霄鳴鳥響巖曲
臨橋濯清颺汎井漱寒玉神物此淵潛愆陽有祈祝風漓慙善教吏懦耻厚祿
整懷塵外想獨往疑有枯過幽難久居濟勝泛高躅策馬尋故蹊歸樵相追逐

送石仲璋

霜風何淒厲蘭蕭同枯萎念此鼻為酸惻愴中心悲由來無醜好眾女嫉蛾眉

數罟困巨魚鹽車厄天駢况復值怨仇目錦成禍機俯首無所訴直醜聽所為
向非知己者雖死誰明之君子有行役後會在何時欲別不敢往瞻望涕漣而
援筆撫我心為公吐此詞

題桃源圖

戰國方忿爭羸秦復狂怒冤哉魚肉民死者不知數斯人逃空谷此殆天所恕
山深無來逕林密絕歸路艱難苟生活種時偶成趣西却與東舍雞犬自來去
熙熙如上古無復當世慮安知捕魚即廷緣至其處遙遙千載後緬想增慨慕
即今生齒懸險絕悉開露山中無木客川上靡漁父雖懷隱者心桃源在何許
况茲太平世堯舜方在御干戈久已戢老幼樂含哺田疇畢耕耨努力勤執樹
毋為問迷津窮探事再舉

題歸去來圖

生世各有時出處非偶然淵明賦歸來佳處未易言後人多慕之效顰惑蚩妍
終然不能去俛仰塵埃間斯人真有道名與日月懸青松卓然操苗華霜中鮮
棄官亦易耳忍窮北窗眠撫卷三歎息世久無此賢

題李伯時元祐內廐五馬圖黃太史書其齒毛

五馬何翩翩
蕭洒秋風前
君王不好武
芻粟飽豐年
朝入閭闔門
莫秣十二閑
雄姿耀朝日
滅沒走飛烟
顧盼增意氣
羣龍戲芝田
駿骨不得朽
託茲書畫傳
誇哉昭陵石
歲久當頽然

酬滕野雲

滕君本臞儒
肝鬲足清氣
賦詩多秀句
往往含古意
大誇江山美
一洗塵土翳
平生有詩癖
得句時自意
爾來荒蕪甚
枯濕常內媿
錦綉忽墮前
令我喜不寐
功名亦何有
富貴安足計
唯有百年後
文字可傳世
雲谿春水生
歸志行可遂
閒吟淵明詩
靜學右軍字
但恐君未閒
書成無由寄

述太傅丞相伯顏功德

興廢本天運
輔成見人庸
輿地久以裂
車書會當同
先帝首在御
如日行虛空
六合仰照耀
一方顧顛蒙
授鉞得人際
止戈代天工
鐵馬浮度江
坐收破竹功
草木紛震動
山川變鴻濛
地利不復險
金城何足攻
市靡易肆憂
兵無血刃紅
孰能年歲間
代國究始終
老稚感再生
遺黎忘困窮
歸來一不取
匹馬走北風

九域自此一益見聖世崇大哉先帝仁允矣丞相忠嗟我始弱冠弗獲拜此公
作頌歌元勳因之寫吾衷

送文子方調選雲南

我友文子方其人美如玉高談動卿相惠利厚風俗文章多古意清切綠水曲
紛紛鳧鷖羣見此摩霄鵠今當使西南萬里道叩蜀銓衡非細事賢俊要甄錄
遠人待子來飢者望子救粟賢勞亦常事但恐期程促馬嘶晨當行草長春正綠
執手臨路歧使我空躑躅

吳真人廬溝雨別圖

驅馬上河梁執手遠別離遠別數千里臨分各相思山川一何悠去去勿復遲
高堂有雙親黃髮映龐眉還家拜堂下置酒作兒嬉却歸見天子忠孝兩無虧
人生如公少致身貴及時此行將未已親壽當期頤

高氏謹節堂

先聖有明訓見諸庶人章少小誦習之白首不敢忘高子躬孝弟養親在高堂
蕭公三大字岌岌端且莊對之銘座右凜然肅冠裳謹身用始節節用乃無荒

斯言非虛語旨遠味自長守此期勿失善積有餘慶

題耕織圖二十四首奉懿旨撰

耕正月

田家重元日置酒會鄰里小大易新衣相戒未明起老翁年已邁含笑弄孫子
老嫗惠且慈白髮被兩耳杯盤且羅列飲食致甘旨相呼團圍坐聊慰衰莫齒
田饒藉人力糞壤要鋤理新歲不敢閑農事自茲始

二月

東風吹原野地凍亦已銷早覺農事動荷鋤過相招遲遲朝日上炊烟出林梢
土膏脈既起良耜利若刀高低徧翻墾宿草不待燒幼婦頗能家井臼常自操
散灰緣舊俗門逕環周遭所冀歲有成殷勤在今朝

三月

良農知土性肥瘠有不同時至萬物生芽蘖由地中秉耒向畎畝忽徧西與東
舉家往于田勞瘁在爾農春雨及時降被野何濛濛乘茲各播種庶望西成功
培根利秋實仰天望年豐但使陰陽和自然倉廩充

四月

孟夏土加潤苗生無近遠漫漫冒淺陂茫茫被長阪嘉穀雖已植惡草亦滋蔓
君子與小人並處必為患朝朝荷鋤往媻耨忘疲倦旦隨鳥雀起歸與牛羊晚
有婦念將飢過午可無飯一飽不易得念此獨長歎

五月

仲夏苦雨乾二麥先後熟南風吹隴畝惠氣散清淑是為農夫慶所望實其腹
沽酒醉比鄰語笑聲滿屋紛然收穫罷高廩起相屬有周成王業后稷播百穀
皇天貽來牟長世自茲卜願言成歲稔四海盡蒙福

六月

當晝耘水田農夫亦良苦赤日背欲裂白汗洒如雨匍匐行水中泥淖及腰膂
新苗抽利劍割膚何痛楚夫耘婦當饁奔走及亭午無時暫休息不得避炎暑
誰憐萬民食粒粒非易取願陳知稼穡無逸傳自古

七月

大火既西流涼風日淒厲古人重稼穡力田在匪懈郊行省農事未黍何旃旃

碾以他山石玉粒使人愛大祀須潔盛一一稽古制是為五穀長異波梯與稗
炊之香且美可用享上帝豈惟足食人一飽有所待

八月

白露下百草莖葉日紛萎是時禾黍登充積漏都鄙在郊既于庾入邑復萬軌
人言田家樂此樂誰可比租賦以輸官所餘足儲峙不然風雪至凍餒及妻子
優游茅簷下庶可以卒歲太平元有象治世乃如此

九月

大家饒米麩何啻百室盈縱復人力多舂磨常不停激水轉大輪磴碾亦易成
古人有機智用之可厚生朝出連百車莫入還滿庭勾稽數多少必假布算精
小人好爭利晝夜心營營君子貴知足知足萬慮輕

十月

孟冬農事畢穀粟既已藏彌望四野空橐桔亦在場朝廷政方理庶事和陰陽
所以頻歲登不憂旱與蝗置酒燕鄉里尊老列上行有羞不厭多魚羔復烹羊
縱飲窮日夕為樂殊未央禱天祝聖人萬年長壽昌

十一月

農家值豐年樂事日熙熙黑黍可釀酒在羊豕肥東鄰有一女西鄰有一兒
兒年十五六女大亦可笄財禮不求備多少取隨宜冬前與冬後婚嫁利此時
但願子孫多門戶可扶持女當力蠶桑男當力耘耔

十二月

一日不力作一日食不足慘淡歲云莫風雪入破屋老農氣力衰偃僂腰背曲
索絢民事急晝夜互相續飯牛欲牛肥交糞亦預蓄蹇驢雖劣弱挽車致百斛
農事極勞苦歲豈恒稔孰能知稼穡艱天下自蒙福

織正月

正月新獻歲農先理農器女工並時興蠶室臨期治初陽力未勝早春尚寒氣
窗戶當奧密勿使風雨至田疇耕耨動敢不脩耒耜經冬牛力弱相戒勤飯飼
萬事非預備倉卒恐不易田家亦良苦捨此復何計

二月

仲春凍初解陽氣方滿盈旭日照原野萬物皆欣榮是時可種桑插地易抽萌

列樹徧阡陌東西各縱橫豈惟籬落閒米葉憚遠行大哉皇元化四海無文兵
種桑日已廣彌望綠雲平匪惟錦綺謀祇以厚民生

三月

三月蠶始生纖細如牛毛婉孌閨中女素手握金刀切葉以飼之擁紙散周遭
庭樹鳴黃鳥發聲和且嬌蠶飢當米桑何暇事遊遨田時人力少丈夫方種苗
相將挽長條盈筐不終朝數口望無寒敢辭終歲勞

四月

四月夏氣清蠶大已屬眠高首何昂昂蛾眉復娟娟不憂桑葉少徧野如綠烟
相呼攜筐去迢遞立遠阡梯空伐條枚葉上露未乾蠶飢當早歸秉心靜以專
飭躬脩婦事踴勦當盛年救忙多女伴笑語方喧然

五月

五月夏以半谷鶯先弄晨老蠶成雪爾吐絲亂紛紜伐葦作曲薄束縛齋榛榛
黃者黃如金白者白如銀爛然滿筐筥愛此顏色新欣欣舉家喜稍慰經時勤
有客過相問笑聲聞四鄰論功何所歸再拜謝蚕神

六月

釜下燒桑柴取繭投釜中纖纖女兒手抽絲疾如風田家五六月綠樹陰相蒙
但聞繰車響遠接邗西東旬日可經絹弗憂杼軸空婦人能蠶桑家道當不窮
更望時雨足二麥亦稍豐沽酒田家飲醉倒嫗與翁

七月

七月暑尚熾長日弄機杼頭蓬不暇梳揮手汗如雨嚶嚶時鳥鳴灼灼紅榴吐
何必娛目耳往來忘愴僂織為機中素老幼要紉補青燈照夜梭蟋蟀窗外語
辛勤亦何有身體衣幾縷嫁為田家婦終歲服勞苦

八月

池水何洋洋漚麻水中央數日麻可取引過兩手長織絹能幾時織布已復忙
依依小兒女歲晚歎無裳布襦不掩脛念之熱中腸朝緝滿一籃莫緝滿一筐
行看機中布計日漸可量我衣苟已成不憂天早霜

九月

季秋霜露降凜凜寒氣生是月當授衣有布織未成天寒催刀尺機杼可無營

教女學紡繭舉足疾且輕舍南與舍北嚶嚶聞車聲通都富豪家華屋貯娉婷
被服雜羅綺五色相間明聽說貧家女惻然當動情

十月

豐年未黍登農心稍逸樂小兒漸長大終歲荷鋤鑿目不識一字每念心作惡
東鄰方迎師收拾令入學後月日南至相賀因舊俗為女裁新衣脩短巧量度
龜手事塞向庶御北風虐人生真可歎至老長力作

十一月

冬至陽來復草木潛滋萌君子重其然吾道自此亨父母坐堂上子孫列前榮
再拜稱上壽所願百福并人生屬明時四海方太平民無札瘥者厚澤敷羣情
衣食苟給足禮義自此生願言興學校庶幾教化成

十二月

忽忽歲將盡人事可稍休寒風吹桑林日夕聲颼颼牆南地不凍墾掘為坑溝
斫桑埋其中明年芽早抽是月俗蚕種自古相傳流蚕出易脫殼絲繿亦倍收
及時不努力知有來歲否手凍不足惜冀免號寒憂

趙文敏公松雪齋全集卷二

趙文敏公松雪齋全集卷三

海上 後學 曹 培廉 敬三 校

五言古詩

次韻周公謹見贈

池魚思故淵，檻獸念舊數。官曹困窘束，卯入常盡酉。簡書督期會，何用傳不朽。十年從世故，塵土滿衣袖。歸來忽相見，忘此離別久。緬懷德翁隱，坐羨沮溺偶。新詩使我和，曠里忘己醜。平生知我者，頗亦似公否。山林期晚歲，雞黍共尊酒。却笑桓公言，淒然漢南柳。

清勝池上偶成

竹色雨餘碧，蟬聲風際清。方池含綠水，中有鱗鱗行。浮沉各異態，亦足悅吾情。欣賞方自茲，庶復得此生。

重用韻

孤花色更媚，密竹氣自清。懷波橘中樂，偶茲池上行。榮華或傷性，賞靜可怡情。坐久不成起，待得月華生。

韓定叟自會稽來作詩贈之

蕭蕭晚雨細浙浙幽叢響爐溫動餘馥研潤生欣賞方欣情話款復此邱園想
卽事可忘憂胡益困塵鞅

次韻韓定叟留別

季冬寒氣結晨興凜嚴霜越江不可涉欲涉恨無梁飄飄各衣薄烈烈北風涼
會少別何多令人心靡忘相去數百里東西渺相望豈無琴與書撫心獨滂惶
鬢毛各已蒼目視亦茫茫中年別親友作惡固其常安得傳羽翼與子俱飛翔

擬古

長夜何漫漫寒雞胡不鳴我行在中野霜露上沾纓虎豹夾路啼熊羆復縱橫
我前鬼長嘯我後啼鼃鼃四顧寂無人北斗高且明天道誠幽遠吾心空屏營
哀鮮于伯幾

生別有再逢死別終古隔君死已五年追痛猶一日我生大江南君長淮水北
憶昨聞令名官舍始相識我方二十餘君髮黑如漆契合無間言一見同宿昔
春遊每挈舟夜坐常促席氣豪聲若鍾意憤鬢屢戟談諧雜叫嘯議論造精覈

魏煌商鼎制駟駿漢馬式奇文既同賞疑義或共析錦囊裝玉軸絕妙晉唐跡
粲然極炫曜觀者咸辟易非君有精鑿疇能萃奇物最後得玉鈎瓊珠螭盤屈
握手傳玩餘歡喜見顏色刻意學古書池水欲盡黑書記往來閒彼此各有得
我時學鍾法寫君先墓石江南君所樂地氣苦下濕安知從事衫竟卒奉常職
至今屏障間不忍覩遺墨淒涼方并路松竹陰真宅乾坤清氣少人物世罕覩
緋袍儼畫像對之淚沾臆宇宙一何悠悲酸豈終極

酬潘提舉

卧病六十日憤憤無一欣時取古書讀那復能知新客從遼東來一見意自親
高談極虛無微言合道真遠宦萬里外飄然絕埃塵歸來如老鶴笑視世間人
胡為肯顧我扁舟雲溪濱白髮我已老青雲子當伸京師人物囿子往無逡巡
而我慵墮久棲遲甘隱淪

新秋

夜來不能寐坐來秋意濃露涼催蟋蟀月白淡芙蓉漸覺練衣薄將欲統扇慵

秋日言懷

暑退草木蘇綠陰秋更繁玄蟬寂無聲蚤已復空四序有代謝人事何足言
塵冠久不彈散髮坐前軒俛仰歲云莫遲此負朝暄

送姚子敬教授紹興

我友子姚子風流如晉人白眼視四海清言無一塵結交三十年每見意自新
皎皎白駒瘦華髮無緇磷此行度浙水言采會稽片會稽山水勝王謝雅所欣
亦有支許儔迭遞為主賓子往訪遺跡掉船鏡湖濱狂客雖已去高情自清真
以子絕代才數賢可比倫登山復臨水嘯歌且怡神時時書寄我用慰情相親
述懷

我性真且率不知恒怒嗔俯仰欲從俗夏畦同苦辛以此甘棄置築屋龜溪濱
西與長松友東將脩竹隣桃李粗羅列梅柳亦清新漸與市朝遠頗覺漁樵親
自謂獨注意白首無緇磷安知永嘉惠再踏京華塵京華人所慕宜富不宜貧
嚴鄭不可作茲懷向誰陳

慶壽僧舍即事

白雨映青松蕭颯洒朱閣稍覺暑氣銷微涼度疎箔客居秋寺古心跡俱寂寞

夕蟲鳴塔砌孤螢炯叢薄展轉懷故鄉時聞風鳴鐸

送李仲淵同知眉州

西風吹客衣秋日明遠樹蕭蕭班馬鳴念子明當去人生貴適意要津何必據
佐州亦不惡足展經濟具蛾眉山川秀文俗盛如故喜子過我樂增我羈旅慮
匆匆萬里別益歎相見暮此心如天河隨子西南注

幽獨二首

閒居無與娛幽獨欣有得松翁善嘯歌花女美顏色人生亦何為耳目皆幻適
我今未半百鬢髮早已白牙齒復動搖行當為去客且盡須臾歡忘言坐苔石
獨坐不自聊披草尋微逕夕陽在高林籬落有餘暎依依增遠想歷歷生晚聽
涼蟬軋鳴箏候蟲擊清磬大小皆有從雄雌各相應沉吟復躊躇忽覺西山暝

允懷齋

安西皇
甫先輩

小齋深且明中有萬卷書齋中古君子寸田自耘鋤人生萬善具政當復其初
操存貴勿忘道積乃有徐時復南榮下靜看雲卷舒

送文章甫陝西都事

籍甚路公孫去為西省客矯矯國士風
婉婉幕中畫涇渭寒有聲終華秋更碧
聊因佐理餘題詩寄來驛

美人隔秋水

美人隔秋水只尺若千里可望不可言
相思何時已庭樹多落葉日夕秋風起
我今年已衰素髮擁兩耳回思少年時
容顏若桃李美人何當來一笑懷抱洗
未見令我思既見胡不喜

贈李明道尊師

我遊皆意行仙館欣有遇麻衣皓如雪
蓬鬢颯以素懸知有道者一見乃如故
行當還山中清飈送雲馭蒼松無凡聲
石局有生路風雷可致坐龍虎儼訶護
空令塵中人矯首企烟霧

雲林山中

松風太古聲欲寫不可狀仰觀空翠滴
俯聽潮音壯豈惟塵慮滌亦覺神情玉
平生獨往意老矣天所放翳翳竹林閒
山鳥時一唱俗氛雖云遠勿起清靜章
九日當采菊登高古相傳我今值佳節
燕坐雲林顛亦有巖間花青蕊露華鮮

采采服九英飲水可長年况茲霜稻熟刈我山下田一飽無復事了我粥飯禪
題括蒼山成德隱玄洞天

洞天在何許乃近在人間神仙亦人耳仙成厭塵寰冥冥隱玄洞峩峩括蒼山
卿雲時翳勃赤烏首飛翻緬懷葛玄翁一往不復還滄霞弄明月解纓濯潺湲
青芝同時生綠蘿共誰攀服食去道遠孤坐亦非丹清歌極幼眇未書勒孱顏
千年有白鶴飛來啟玄關

題先天觀

對此山水詠使人塵慮銷况茲構真館燕坐遠煩囂青林陰戶牖素雲冠山椒
松風和澗泉雜佩響瓊瑤焚香玉女降長齋百靈朝仙道本不遠清都亦非遙
自嗟衰莫年頗費接鶴招安得生羽翰從予以逍遙

周南翁悠然閣

青山與高人一見如有約悠然相莫逆無語心自樂凌虛步丹梯攬秀有高閣
應同九臯鶴翺翔在寥廓

夏日即事呈六兄

下簾却畏日開軒
納清風雖無政事關
亦見好惡公此心如白璧
聊與世容容
有兄遠方來一笑杯酒同
我雖不解飲預恐尊中空
呼兒更往沽勿使歡意窮

送謝伯淡太史院都事

纂纂素實繁
嘒嘒蟬聲稠
炎暑尚雨熾
西風猶未秋
憐子觸熱行
不憚道里脩
棧閣天下險
錦城西南陬
過家因上冢
聖恩肯林邱
鞍馬雖驅馳
於義不可留
子材瑚璉器
用世美且周
明時方任賢
驛程難久遊
去去早言還
庶解離別憂

偶記舊時一首在德清別業時作

春情浩無端
野興欣有矚
山光豔桃李
澗影寫松竹
古來巖穴士
白駒在空谷
幽鳥何處來
啼破林烟綠

遊幻住庵

雨後溪水溢
黃流行地中
輕舟何迅邁
汭波兼順風
碧蘆幹始長
柔桑葉已空
瞬息抵山曲
竊窕微逕通
青林夾道周
流泉響幽叢
多慚衆衲子
前路相迎逢
禪居新結構
斧斤未輟工
雙閣出塵囂
六窗自玲瓏
久矣厭城市
飄如脫樊籠
妙香清鼻觀
新鶯驚耳聾
泂水插山花
開牖納風松
經聲出廊廡
寂然聞鼓鐘

蔬食欣一飽亦與膏梁同緬懷老尊宿燕坐毗盧峰屢緣苦未斷無由往相從
一宿返歸棹回望但青蔥

清河道中

揚舲清河流開蓬素秋曉爛斑被屋花委蛇順流藻天清去雁高野闊行人小
故園歸有期客愁淨如掃

夏至

夏至午之半一陰已復生堅冰亦馴至顧豈一朝成萬物方茂悅安知有彫零
君子感其微慟哭幾失聲

庭前松

手種庭前松於今二十年清風時過之我琴不須絃高標傲歲晚秀色凝空烟
有懷貞白君世豈知其玄

謝貞居先生寄周鍾

七月六日承貞居先生遠寄周鍾鏡間有文象鳧之形則考工記所謂
鳧氏為鍾者也擊之與夸則合而是日又適立秋古物之來豈偶然哉
輒成小詩
拜貺之辱

故人賞我趣遺我鳧氏鍾制與周禮合試叩聲春容是日新秋節夸則還為宮
懸之西楹下浮磬儼在東金石互相應間以絲與桐八音雖未備古樂將無同
鼎尊鐸解貞羅列見古風揖讓與其間令我懷周公作詩報佳貺庶以開羣聳
閒居

荒庭無弗治翳翳草與筠池魚出娛客林鳥來依人閒居意自足何者為戚欣
況於黃卷間時與聖賢親

病中春寒

仲春尚寒氣林花無豔滋散裘擁衰疾風雨何淒其始雷發東隅霽牖陽光披
微風草際動落英池面移幽禽變圓吭遊魚揚細鬣我病自此愈泛舟溪水湄
小輿指南蓋短筇問東毗機心不復有高蹈農與義

松澗詩贈丁師善

青松上參天下有幽澗泉高人居其間萬慮不至前讀書得妙趣視世等浮烟
胡為舍此去杖策走日邊要當陳忠益民瘼會有痊却歸弄泉石靜聽松風眠

興中府某氏見山樓

東北有高樓迢遞數十尺朝霞映窗牖浮雲來几席莽蒼一望間翠律千峰碧
青山何處無所見多迫迤偉哉醫無閭周禮載簡冊我雖身未到心想已可索
但惜道里賒處地遠且僻嘉彼樓居予不受世故役愛山如愛客相對樂晨夕
應笑平地人塵埃坐充斥

贈恢上人

晨坐古松下有僧來叩扉松花落金粉細細點春衣折松當麈尾相對澹忘機
湯沐不可作政索解人稀

露坐

露坐夜將半澹然無所為草根蟲鳴歇松梢螢度遲城市多塵雜令人心不怡
茲邱亦可老已與白雲期

題黃華為其父寫真

仙人紫霞衣危坐古松間玉色映流水不動如邱山平生黃華老得意每相關
九原如可作與君相對閑

題先賢張公十詠圖

張先子野之父

吳興瀟灑郡自古富人
物溪山映亭榭尊俎
照華髮當時盍簪地
秦斧久蕪沒空餘詩
語工不共芳草歇撫
卷想勝風冠佩其改
忽先民不可見惆悵
至明發

犀浦遊觀

男子四方志蜀都天下奇
李侯并門豪杖節鎮坤維
愛此雪山雄卜宅犀浦涓
錦城既云樂焉用還家為
遺像開生面清風凜英姿
應同武侯廟人懷千古思

吳俊卿義塾

禮義生富足為富或不仁
誰能如吳君捐己以惠人
開塾延師儒聚書教比鄰
豈徒名譽美要使風俗淳
人物方渺然作養富及辰
文章雖致身經術乃新民
宣公相業著輔于理學醇
二于鄉先正于載德不泯
吳君真盛舉勉哉繼前塵
何當襲春服從于語水濱

寄題杜尊師白雲庵瓊秀亭

白雲從何來乃在計籌山
山中古仙伯翺翔白雲間
城市多囂塵山林幽且閑
結屋松竹裏開窗泉石邊
清齋誦道德焚香降神仙
俯仰皆自得洗心游泰玄
稅駕往從之規買山下田
執藥掃白髮栽桃映紅顏
庶幾林下意期了區中緣

丹成從師去笑拍洪崖肩

瓊山發天秀珠泉表地靈柔美吐丹葩喬林標絳英酌醴吸冲和
沃澗漱甘清石門開洞府木龍走巖窟清飈一時至四座浮幽馨
閨風何必遠世塵空自溟從遊當有期淹留詎無成左手擷紫芝
右手采黃精振衣陟崇岡遐觀散神情長嘯烟霧裡滿空鸞鶴聲

七言古詩

楊堅州治水歌

秋水至今大河溢金隄決兮流漂疾田疇汨兮為民憂魚鱉肆兮
地上游誰能治水兮徵揚侯具畚鍤兮萬人聚勢悍急兮不可以禦
問河伯兮何所怒歲不登兮民且翼侯精誠兮感神明赤蛇蜿蜒兮
昭厥靈奠桂酒兮薦芳馨神攸歆兮隄防成水復故道兮民戴
孟天子聖兮地道平萬歲千秋兮揚頌聲

題舜舉著色梨花

東風吹日花冥冥繁枝壓雪凌風塵素羅衣裳照青春眼中若有梨
園人攀條弄芳畏日夕只今紙上空顏色顏色好愁轉多與君沽酒
花前歌

兵部聽事前枯柏

庭前枯柏生意盡枝葉乾焦根本病黃風白日吹沙塵鼓動哀音亂人聽嗟哉
爾有歲寒姿受命於地獨也正雨露雖濡心自苦鳳鳥不來誰與盛豈無松檟
在山阿只有蓬蒿没人脛我生媿之梁棟才浪逐時賢繆從政清晨騎馬到官
舍長日苦飢食還併簿書辛勤不得休坐對枯槎引孤興人生何為貴適意樹
木託根防失性幾時歸去卧雲林萬壑松風韻笙磬

題西谿圖贈送鮮于伯幾

山林忽然在我眼攬袂欲遊嗟已遠長松謾謾含蒼烟平川茫茫際曾巘大梁
繁華天下稀走馬鬪雞夜忘歸君獨胡為甘寂寞坐對山水娛清暉西谿先生
奇崛士正可著之巖石裏數間茅屋破不脩中有神光發奇字綠蘋齋葉白芷
生送君江南空復情相思萬里不可見時對此圖雙眼明

題二喬圖

長江東來水滔滔誰謂江廣不容舫中有喬家女兒淚何意師昏隨二豪龍虎
方爭欲相啗鸞鳥鍛翮將安逃不見當時老諸葛獨聘醜婦何其高

題黃素黃庭後

此書飄飄有仙氣意其為揚許舊跡蓋人間至寶伯幾所藏也

琴心玉文洞玄金鈕朱錦乃汝傳子能得之可長年黃素纈粟兒且堅橫理如髮約兩邊從有赤道如朱絃文居其間走玄蛾飛雲卷舒相終始大道甚夸非力使無為自然有至理誰能精專換骨髓掃除俗塵不瑕穢目中有神乃識真白玉為軹裝車輪裹以天上翠織成仙人樓居儼長生鸞鶴翔舞後孫輕子能寶之慎勿驚宮室之中夜自明上清真人揚與許焚香清齋接神女手作此書留下土千年流傳子為主東方蒼龍右白虎廉不予求貪不與

戲題出洗馬

鬻却受駕誰能御駕蹇紛紛何足顧清絲絡首錦障泥鞭筭空勞怨長路明窗戲寫乘黃姿洗刷歸來氣自怒不須對此若歎嗟男兒自首多徒步

送孟仲則遊荆湖兼往襄漢

行路方難予何往瀟湘洞庭天一方長江風來浪如雪荆門木落天雨霜千金養客不復見萬里訪舊庸何傷予才有用未得試牛刀愛惜藏鋒銳似聞遠遊未渠央更欲攬轡趨襄陽昔年戰鬥且休息白骨已瘞愁雲黃伏龍鳳雛在何

處鹿門山色還蒼蒼登高弔古一長嘯萬事慘淡悲中腸人生聚散安可常為君起舞君舉觴明朝帆影拂浮玉寄言客居思故鄉

烈婦行

至元七年冬邠州軍士劉平之戍棗陽與其妻胡俱道宿車下平為虎所得胡起追及之殺虎脫其夫吾聞之中原賢士大夫如此乃為感歎慷慨作烈婦行以歌之

客車何焯焯夫挽婦為推問君將安去言往棗陽戍官事有程宿車下夜半可憐逢猛虎夫命懸虎口婦怒髮指天十步之內血相濺夫難再得虎可前並與夫死毋與虎生呼兒取刃力與爭虎死夫活心始平男兒節義有如許萬歲千秋可以事明主馮婦下莊安足數嗚呼猛虎逢尚可甯成甯成奈何汝

送高仁卿還湖州

昔年東吳望幽燕長路北走如登天捉來官府竟何補還望故鄉心惘然江南冬暖花亂發朔方苦寒氣又偏衣皮三寸冰六尺面頰欲裂凍折弦盧溝強弩射不過騎馬涇度不用船宦遊遠客非所習狐貉不具絺袍穿京師宜富不宜薄青衫駿馬爭騰騫南鄰吹笙厭梁肉北里鼓瑟羅姝妍淒涼朝士有何意瘦

童羸騎雞鳴前太倉粟陳未易糴中都俸薄難裹纏爾來方士頗向用讀書不
若燒丹鈔故人聞之應見笑如此不歸殊可憐長林豐草我所愛羈約未脫無由
緣高侯遠來肯顧我裹茗抱被來同眠青燈耿耿照土屋白酒薄薄無軍糧破
愁為笑出軟語寄書妻孥無一錢江湖浩渺足春水鳧雁滅沒橫秋烟何當乞
身歸故里圖書堆裏消殘年

贈相士

我昔放浪江湖間舉頭開眼看青山安知世故不相舍坐受塵土彫朱顏髭鬚
已黃行且白亦知人生不滿百功名富貴非我事但願有酒呼好客錢塘江邊
逢少年兩眼善相口談天封侯食肉骨法異慎勿置我諸公前江南春暖水生
烟何日投閒苕水邊買經相牛亦不惡還與老農治廢田

謝鮮于伯幾惠震餘琴

此琴云是許旌陽手植桐所斲

仙人已歸白雲中空餘手植青枝桐根柯盤鬱如蛟龍一朝霹靂驅雷公烈火
半藝隨狂風箕子之裔多髯翁才氣邁俗驚愚蒙抱持來歸尋國工斲為二琴
含商宮我來自北欣相逢持一贈我為我容自吾得此不敢寐終夜起坐彈孤

鴻下絃清冷上黃鐘轉絃更張涕滿胃苗虞已遠將無同恨君不識牙與鍾恨
我不識瞽與矇周南大雅當誰從

贈相者

吾聞伯樂善相馬一顧千金長高價何人個儻買權奇滿眼駑駘居櫪下張君
年少自有神走半江湖多閱人我生瘦悞之駿骨浪許騰驤防失真連朝春雨
今始晴花枝照眼生春情樓前山色橫翠靄湖上柳黃飛亂鶯便須沽酒與君
飲醉倒花前猶滿引懶從唐舉問流年欲向德翁謀小隱

漁父詞二首

仲姬題云人生貴極是王侯浮利浮名不
自由爭得似一篇舟弄月吟風歸去休

渺渺烟波一葉舟西風木落五湖秋盟鷗鷺傲王侯管甚鱸魚不上鉤
儂住東吳震澤州烟波日日釣魚舟山似翠酒如油醉眼看山百自由

送朱仲陽太平教授

列仙之儒山澤臞手中黃紙新除書教官雖冷實清選當塗山川如圖畫我生
無能百不如盍不從君賦歸與請君為我酬太白矯首南望心煩紆

題李公略所藏高彥敬夜山圖

高侯胸中有秋月能照山川盡豪髮戲拈小筆寫微茫只尺分明見吳越樓中
美人列仙懼愛之自言天下無西窗暗雨政愁絕燈前還展夜山圖

贈吳真人父封饒國公母饒國夫人

上清真人天上來雲收霧斂天門開手持璽書歸故里瓊瑤玉佩相追陪堂上
老仙千歲壽喜兒歸來酌春酒帝命建爾于上公老仙拜前兒拜後古來于貴
父母榮今見恩榮萃一門紫衣玉帶照華髮金冠瑤簡明朝暎人間五福誰能
備歲晚寒香滿天地真人妙行我所知曾是玉皇香案吏

題七先帖木兒開府宅壁畫山水歌

大山萃嶽摩清天小山平遠通雲烟商侯胸中有邱壑信手落筆分清妍閣風
玄圃元不遠燦爛金碧流潺湲參差澗谷樓觀起縈紆石路朱橋連松風颼颼
響虛閣棋聲剝啄來羣仙漁歌樵唱渺何許綸巾羽扇清溪邊高情自有泉石
趣涼意不受塵埃世間書畫亦豈少誰能真賞如公賢華堂風日不到處絕勝
繡幙空高懸舉觴酌酒為公壽眼明對此三千年

孤燕曲

燕燕復燕燕孤飛不忍見故雄已作長別離孀雌守節令人羨昔日雙雙拂烟
草千年獨宿梁閒藻歎息人間貞婦少人獨何心不如鳥

題商德符桃源春曉圖

宿雲初散青衫濕落紅繽紛溪水急桃花源裏得春多洞口春烟搖綠蘿綠蘿
搖烟挂絕壁飛流淙下三十尺瑶草離離滿澗阿長松落落空碧雞鳴犬吠
自成邨居人至老不相識瀛洲仙客知仙路點染丹青寄輕素何處有山如此
圖移家欲向山中住

秋夜曲

雨聲滴夜清漏長朱簾金幙浮新涼閨中美人動裁翦故羅衣袂生秋香東鄰
剝棗西鄰穫旅館無人念飄泊餘不潦盡涵清輝芙蓉壓堤怨不歸牆根草綠
陰蛾飛

葡萄架空墮殷玉遙夜露寒生體粟暗蛩淒草鳴不平無絲經緯空勞促夢魂

苦短道苦長萬山深處非吾鄉玉蟲搖缸螢入屋去雁來魚應可卜醒眼瑩瑩

愁萬斛

孔道輔擊蛇笏

以笏擊蛇有孔公義與段公擊賊同事之鉅細雖有異正氣忿激生於中偉哉
孔公聖人裔豈聽妖邪亂民志即今槐木一尺強氣象凜凜含風霜子孫守之
慎寶藏絕勝象牙堆滿床

李氏種德齋

一年之計種穀十年之計種木百年種德知何事插架鱗鱗書滿屋世人青報
嗟何速我自無心激後福日中為市百費鬧競逐錐刀蛾赴燭鬻書之利雖云
薄要令舉世沾膏馥為賢為智皆由此耕也未必能干祿他年種德看成功遠
在于孫應可卜

贈張彥古

秋雨新已風日清忽聞剝啄敲門聲出逢麻衣老仙伯身長七尺雙瞳明平生
學道幾半世一見洒洒心為輕大道無為返爾朴自然有路通長生我今素髮
颯以白宦途久矣思歸耕吳興山水况清絕白雲滿嶺堪怡情老仙何當從我
去小築茅屋依崢嶸還丹已就蓬島近笑指塵海尋方平

送田師孟知河中府

漢二千石入為相邑令或入為三公聖朝用人亦復爾予以此賀田河中田侯
年少與予友今三十年俱白首離觴未盡去馬鳴愁向風前折楊柳

趙克敬耘庵

趙子居室名耘庵不以雨暘為旱潦寸田尺宅勤自治稂莠芟嘉穀好平生
萬事無助長歲晚所收皆至寶我託官聯幾一載懷抱於人每傾倒交情雅有
古淡風此意難為輕薄道况我同姓古所敦百世可知宜細攷三十年來如一
夢白髮相看今盡老我方告歸理墓田莫怪賦詩殊草草

臙脂驄圖歌

騏驎驪裏世常有伯樂不生淹棧豆歛見此圖神自王權奇磊落龍為友隅目
晶熒生紫光錦毛錯落蒙清霜霜蹄蹙踏寒玉響霧鬣振動秋風涼朝浴扶桑
騰浩蕩莫秣崑崙超象罔雄姿似隘六合小盛氣欲滌浮雲上嗅塵一散驚肉
飛奮迅不受人間鞿豈惟萬馬羞欲死直與八駿爭先馳只今相者多舉肥歎
息此圖誰復知君不見王處冲半生隱德真成癡

贈捏古伯

有僧有僧住江心以色殺人凶且淫貪官若吏私其金滅跡鉅海無由尋安知
冤魂痛不釋羣然號訴衆所覲盡誅凶儔冤始白誰其白之捏古伯

送高郎仲德往汝州迎母

高郎八歲失其母每一言之淚如雨忽然有信自北來知道慈親在臨汝艱難
一別四十年驚喜失聲渾欲舞水行有舟陸有車襆被即行身欲羽遙想團圞
再拜時膝下抱持喧笑語人生天地誰無母此別真如隔今古焉知孝感動神
明萬里言歸復相覩吳興山水清且遠指日安輿還樂土我當理舟楫迎汝買
紅纏酒封肥羶斑衣喜色映庭萱白髮從教老農圃

次韻葉公右丞紀夢

倦遊客子何時去屢欲言歸天未許故鄉樂事時上心破浪長魚日登俎一簞
一笠得自由某水某邱猶可數前年有詔舉逸民一旦馳驛登天府豈知佐理
自有才勉強盡瘁終無補青春憔悴過花鳥白日勾稽困文簿栖栖願汗逐英
俊往往笑談來訕侮倦僕思歸語見侵瘦馬長飢骨相拄天生我公出瑞世輔

相明時期復古好將圖畫上凌烟未遂衣冠掛神武髭鬚半白稱貂蟬步履漸
輕宜印組道長自覺小人消亂沮政須君子怒得開有兆天與祥吉夢初回月
當戶因公此意乞歸田不辭歌詩為公舞

楊天瑞府判平冤詩

至元年間歲辛卯建孟總管有馬謀間因盜起建陽縣欲引鎮軍肆誅屠聞民
張氏有女子小名月娘美且姝思得此女恣淫泆乃誣張氏與賊俱月娘逃匿
不可得旁及鄰女遭姦汙既得月娘欲滅口父母親戚皆因得一家九人一時
斃痛入骨髓天難呼其餘五人亦瀕死身被榜掠無完膚人家不幸產尤物破
家滅族真無辜楊侯天瑞為府判深疑此事皆虛誕奮然仗義以死爭力謂馬
謀當併按月娘得脫為良人待盡殘囚出獄狂沉冤極枉一旦伸臺省交章同
論薦聖神天子甚明察詔下天門發英斷馬謀竟以罪伏誅行路聞之亦咨歎
邑人為侯生立祠牲酒續紛勤薦裸楊侯平反世希有宜有升遷示旌勸政事
固因才德美歲月難將資品算即今已過二十年那拋朱紱換青衫臯夔在位
方進賢請為誦我平冤篇

賦張秋泉真人所藏研山

泰山亦一拳石多勢雄齊魯青巍峩此石却是小岱岳峰巒無數生陂陀千巖
萬壑來几上中有絕澗橫天河粵從混沌元氣判自然凝結非鑄磨人間奇物
不易得一見大叫爭摩挲米公平生好奇者大書深刻無差謫傍有小研天所
造仰受筆墨如圓荷我欲為君書道德但願此石不用驚巧偷豪奪古來有問
君此意當如何

題舜舉摹伯時二馬圖

二龍何時飛上天空有駿影人間傳一匹鳳頭來于闐一匹賜名花滿川李侯
作畫迷者錢想見溫公當國年太平時節巡遊少立仗歸來飽春草老向天顏
無戰功馬自不逢人皞皞

兔

少年馳逐燕齊卸身騎駿馬如騰蛟耳後生風鼻出火大呼討來飛鳴鶻如今
老大百憂集拄杖徐行防喘急卷中見畫眼為明驥聞秋風雙耳立

討來國語
朝謂兔也

贈相師王蒙泉

木雪齋全集 卷三
王君善相多奇中說好誇奇無刺風已將幻化等虛空間壽幾何持底用遭時
乏才偶致位處非其宜常自訟詞林每媿文字拙玉帶却憐腰體重身歸閭里
困衰疾心戀闕庭形夜夢端如老驥欲倒駿骨雖存難受鞚清溪如玉遶屋
廬箇箇漁舟時看弄且將閒散樂餘生豈望殘年給殘俸

趙文敏公松雪齋全集卷四

海上 後學 曹 培廉 敬三 校

五言律詩

春寒

夜雨鳴高枕春寒入敝袍
時光自花柳吾意豈蓬蒿
失色黃金盡知音白雪高
山林隱未得空覺此生勞

雪後同于俊遊何山次韻四首

同是清閒客俱為放浪遊
晴山依雪壯野水帶冰流
風急松杉亂年登齋麥收
生涯雖未老吾欲覓菟裘

步履行危磴憑闌得妙峰
鳥飛迷故道人去想遺蹤
掩冉風前竹支離澗底松
山僧飯不足不是忘鳴鐘

兵革時猶動山林日就荒
于真思隱遁詹尹問行藏
有意隨三飯無人饋五漿
遠山湖外白立見馬微茫

湍駛波翻雪風生地出雷薄
醪隨意盡寒氣逼人來
更欲明朝去何妨
迫暮回

自憐非李廣醉尉莫相猜

早春

谿上春無賴清晨坐水亭
草芽隨意綠柳眼向人青
初日收濃霧微波亂小星
誰歌采蘋曲愁絕不堪聽

重遊弁山

出郭聞鶯語穿林散馬蹄
澗松何鬱鬱春草又萋萋
白石那堪煮丹崖倘可梯
平生愛高興只合此幽棲
竹色迷行逕松聲洶座隅
水清花自照風暖鳥相呼
飲罷思棋局歌長缺唾壺
重來瀟洒地聊足慰須臾

魚樂樓

樓下南來水清冷百尺深
菰蒲終夜响楊柳半谿陰
日月驅人世江湖動客心
向來歌舞宴達曉看橫參

秋夜

草蔓行多露蟲聲報早秋
明河斜未轉大火已西流
欲作傳杯飲誰能秉燭遊

清晨拂鞍馬適野擬消憂

次韻陳無逸中秋月食風雨不見

谿月當圓夜看雲起莫愁層陰連積水伏雨暗清秋白璧難容玷明珠不可求
每因觀節物轉覺此生浮

獨夜

生事憐吾拙懷人阻道脩角聲悲靜夜燈影伴幽憂水落紅衣老天寒翠袖愁
雲中有過雁哀叫亦何求

次韻子山登樓有感

西北高樓好登臨望眼空弁山橫雨外笠澤浸天東計乏千金樂羞看百鍊銅
只應將世事都付酒杯中

懷古清何極登危氣尚雄江山一時勝宇宙百年中翠袖愁空谷緜袍受朔風
超然高舉意決皆送飛鴻

聞角

吹角秋風裏邊聲入暮雲抑揚如自訴哀怨不堪聞老馬行知道孤鴻飛念羣

林雪齋全集卷四
祇今霸陵尉那識舊將軍

次韻馮伯田秋興

搖落故園秋谿山處幽無錢頻買酒多病倦登樓
文采陶彭澤丹青顧虎頭誰能混流俗浩蕩一浮漚

風緊草木變露寒沙水清蕭蘭嗟共悴鶉鴉忍先鳴
黃閣非吾事青山不世情浩歌聊感激裘馬任肥輕

興逐秋風發愁隨秋夜長繫書陽鳥遠促織候蟲忙
世已無劉表家徒有孟光故衣寒未補發篋動幽香

本齋先生輓詩

首我先君子交游半老儒詞林宗匠在制閫輔臣須
晚節風塵際閒居歲月徂謬稱詩賦善深痛典型無

德邵龜齡邁神全鶴髮春管孟安卓帽龔勝謝蒲輪
小楷名空在遺言意更親平生知己恨淚落雪溪濱

公為孟頫作研銘嘗刻之研底
又臨終呼孟頫多所囑故云

贈權李玉兼簡李順甫

幕府文書靜湖山春事多風烟歸逸興花鳥助高歌自愧諸生後其如二妙何
卜鄰應有日退食數相過

奉和帥初兄將歸見簡

戴子文章伯不為時所知朱絃非衆德白璧易羣疑海樹生秋早江船渡越遲
莫愁千里別要作百年期

我坐幽憂疾非君誰與娛清談忘日夜高論到唐虞天地無青眼江湖有白鬚
客居宜鬱鬱歸興託萼鱸

送楊幼澄教授歸江西兼寄吳幼清

客裏相從久愁中欲別難此行登仕版未覺負儒冠北度憐江總東歸憶幼安
著書應滿屋妙處共誰看

送李清甫由御史出按四川

蜀道青天上繡衣驄馬行霜威御史府春色錦官城萬里平反報三年殺水清
相逢一杯酒似為別離傾

送劉伯常淮東都事

久客倦遊甚思歸勞寸心之子復南邁欲別惜光陰蕭條楚山遠渺瀰淮水深
夢中不可到何用解愁襟

晉公子奔狄圖邀端父御史同賦

杌隍居蒲日艱難奔狄時天方興伯者數子實從之歲久丹青暗人賢簡冊悲
至今綿上路猶憶介之推

題米元暉山水

卧遊渺萬里楚天清曉秋初日江山出白雲山際浮莽蒼迷烟樹隱約見孤舟
丹青不可作思子徒離憂

送張仲實還杭州

張子早英發哦詩遺垢氛瘦骨暎秋水青眼視晴雲黃公酒壚側王令為書裙
相望苦不遠何用惜離分

食粥

杲杲西流日滔滔東逝波春光薊邱晚柳色上林多不道含香賤其如食粥何

明時無小補郎署謾蹉跎

酬衛處士見贈

之子有道氣山居詩興多
琴清鶴自舞林靜鳥能歌
未遂攜家隱深慚輟棹過
他年從杖屨養壽向巖阿

送吳禮部奉旨詣彭湖

為國建長策此行非偶然
止戈方見武入海不求仙
朱紱為即日金符出使年
早歸承聖渥圖像上凌烟

大司農侯公輓詩

理學推高第清朝位列卿
政聲先日著經術莫年精
乍識俄離逝方閑遽隕傾
重為天下惜涕淚落縱橫

和周景遠見寄二首

四海多兄弟交情子獨親
方將尋舴艋何意畫麒麟
簿領淹豪士江湖著散人
相看俱老大喜見二毛新

止酒陶彭澤能書王右軍
逃禪益避俗感舊惜離羣
澤國茫茫水霜空黯黯雲

為農投老去北望隱思君

奉隆福召命赴都過德清別業

驟喧氣候變幽園卉物淒山雲石上起春鳥雨中啼牽衣憐稚子舉案愧山妻
苦被虛名累未得遂高棲

謝石林贈湖石次其韻

怪石曾德法來從不二門玲瓏浮磬韻斑駁古苔痕池月巖邊上春雲水面屯
微雨能輒贈此意向誰論

筇竹杖贈天聖長老仁公仁有詩次其韻

瘦節蒼骨聳臙膚黃玉溫苔間時卓地月下屢敲門持贈松廬老攜尋水竹邛
歸來倚空壁夜氣與俱存

胡穆仲先生輓詩

我有三益友對之如古人布衣甘陋巷書冊老遺民淚落黔婁被神傷郭泰巾
請為千字誄書刻上堅珉

贈永清曹顯祖縣尹

赤縣卽官宰清朝學士班雲端雙履去花底一琴間鴻鵠宜天路麒麟近帝開
會當從此召宣待及瓜還

贈鄭之僑

我有故人于少年能綴文偏工吟九日已解賦齊雲落落駒千里昂昂鶴出羣
却憐吾老矣鬢髮白紛紛

來鶴亭

在杭州開元宮吾往年遊宮中而適有鶴來因為書二字以名亭

客遊真館日鶴來空園時援筆二大字欣然千載期長鳴松月照屢舞竹風吹
天路何寥廓吾與爾同之

大都遇平江龍興寺僧閒上座話唐綦毋潛宿龍興寺詩因次其韻

聞說龍興寺多年未款扉風林發松籟雨砌長苔衣殿古燈光定房深磬韻微
秋風動歸興一錫向空飛

李太白酒樓

在任城今新濟州是

城迴當平野樓高屬暮陰謫仙何俊逸此地昔登臨慷慨空懷古徘徊獨賞心
嶧山明望眼百里見遙岑

送崔伯玉雲南省都事

萬里雲南路青山落照邊省郎新紫綬幕府舊紅蓮見面嗟吾晚觀文覺子賢
只應清淑氣不受瘴溪烟

題趙敬父侍御祖德詩

棄子抱兄子古來聞節攸賢哉趙氏母盛德邁前脩陰隲理須復高門慶自流
洗洗庭下玉簪笏盡公侯

獲周豐鼎

見博古圖第三卷銘六字

豐鼎制特小周人風故淳摩掌玉質潤拂拭翠光勻鑄法觀來妙銘文考更真
平生篤好古對此興彌新

贈劉節軒侍御

驄馬人皆避沙鷗意獨聞天恩霑贈典泉壤慰慈顏樂在簞瓢外春生杖屨間
聞聞且行樂但恐趣朝班

雨

槭槭衆葉响滋滋生意新知誰實揮洒解使盡圓勻蛛網懸珠絡荷盤瀉汞銀

喜涼生枕簟愁潤逼衣巾

寄題陸振之與閒堂

一閒天所與萬事世從疎
名教有樂地安心為廣居
林間聽啼鳥濠上看遊魚
意適無餘想時還讀我書

次韻觀復表兄見簡

寒雨何時已停雲不肯開
難陪山簡醉空憶謫仙才
梅蕊枝枝發幽禽日日来
可能無過我
真復見詩催

載酒無人到山園
畫掩門泥深妨步屨
雨暗只空邗
每憶文園渴難忘
北海尊
何當來就飲聽我撫桐孫

故兩浙運使李公輓詩二首

首我閒居日公來作守時
敝廬曾寓止暇日每娛嬉
篆籀傳書法絃歌送酒卮
情親自茲始歲晚辱深知

白髮儀型老清朝
侍從班理財羞聚斂治郡已痼瘵
卧疾留南久招魂竟北還
向來漳水道淚落郭西山

五言排律

送張夢符郎中還朝

侍從班行近，咨謀出使頻。
乘輶山水國，把酒淞江春。
驄馬歌仍在，祥麟德自馴。
大書誠有法，妙句不無神。
愛士容疎放，忘年接隱淪。
回轅瞻斗極，聽履上星辰。
此別真堪惜，茲情未易陳。
數公如見問，為說混風塵。

送董參政赴召

丹極飛明詔，鋒車召老臣。
仲舒經術邃，賈誼讜言陳。
偃草懷殊俗，安田慰遠人。
公心如皦日，江國自熙春。
散亂堆床帙，蕭颺滿案塵。
詭隨吾不忍，高卧理還伸。
入奏能回主，當言莫愛身。
衰衣瞻望重，文席侍趨頻。
鉛槧工無益，樵漁意已親。
白鷗波萬里，浩蕩未能馴。

投贈刑部尚書不忽木公

胄子何多士，明公特妙年。
詩書師法在，簪紱相門傳。
曳履星辰上，分光日月邊。
帝心知俊彥，羣望屬英賢。
大木明堂器，朱絲清廟絃。
吉人詞自寡，君子德為先。
斷獄陰功厚，優儒禮數偏。
我非天下士，人謂地行仙。
山好雙游屐，溪清一釣船。

賦詩特遣興好客恨無錢政爾韋編絕俄聞束帛茂風塵驅驛騎霜雪洒鞍韉
別婦經春夏離鄉整四千家書愁展讀旅食困憂煎卽位蒙超擢官曹幸接聯
屢聞哦鄙句信或有前緣知己誠難遇捫心益自憐樊中淹澤雉春晚怨啼鵑
驥病思豐草鴻冥羨遠天仁言如借便白首向林泉

送夾谷公分省陝西

憶從長楊獵于時始識公堂堂九尺榦落落萬夫雄補袞彌縫密能書點畫工
勞謙延士類豈弟到兒童黃閣歸人望青雲有父風驅馳常扈從奏對每留中
暫輟尚書履榮分陝右弓秦山依畫錦燕雪感秋蓬粉署趨承舊瀛洲忝竊同
因公動鄉思飛夢過江東

秋日卽事

今日秋色好天高景不暄清飈動林薄涼意滿邱樊俗客無因至幽禽時自言
露濃金盞側香遠玉簪繁誰辦東山妓空餘北海尊莫吟招隱賦桂樹可攀援

元日朝賀

兵曹
時作

闔闔曙光生觚稜瑞靄橫治朝春有象嚴躡物無聲簪笏千官列簫韶九奏成

彤墀簇仙仗翠樹拂霓旌絕域梯航至來庭玉帛盈皇圖天遠大聖德日高明
兵息知仁布民熙見化行耄倪齊鼓舞率土共升平

奉贈平章李相公十韻

魚水千年慶龍雲億載春乾元開泰運聖主得賢臣畫像丹青炳書題刻畫真
春宮承寵舊秋谷賜名新扶日登皇極經邦贊化鈞甘盤基相業傳說應星辰
報國非私己逢時豈愛身誰能動天子今復見山人始白詩書效行看俗化淳
願陳歸美意作誦比烝民

題楊司農宅劉伯熙畫山水圖

移得山川勝坐來烟霧空窗中列遠岫堂上見青楓巖樹參差綠林花掩冉紅
鳥飛天路迥人去野橋通邛晚留遲日樓高納快風琴尊會仙侶几杖從兒僮
疑聽孫登嘯將無顧愷同微茫看不足瀟洒興難窮碧瓦開蓮宇丹樓聳竹宮
亂泉鳴石上孤嶼出江中籍甚丹青譽益知書畫功煩渠添釣艇著我一漁翁

七言律詩

和姚子敬秋懷五首

銅雀春深漢苑空，邯鄲月冷照秦宮。烟花樓閣西風裏，錦綉湖山落照中。河水
南來非禹迹，冀方北去有唐風。溪城秋色催遲莫，愁對黃雲沒斷鴻。
落日孤城動鼓鼙，愁中畫角不勝吹。山川蕭瑟秋雲淨，草木彫傷暮雨悲。多病
馬卿聊暇日，數奇李廣不逢時。卷簾白水青山裏，隱几無言有所思。
搔首風塵雙短鬢，削身天地一儒冠。中原人物思王猛，江左功名愧謝安。首肯
秋高戎馬健，江湖日短白鷗寒。金尊綠酒無錢共，安得愁中却暫歡。
吳宮烟冷水空流，慘澹風雲暗九秋。禾黍故基曾駐輦，芙蓉高閣迥添愁。綉楹
錦柱蛟龍泣，金沓瑤階鹿豕遊。宋玉平生最蕭索，欲將九辯賦離憂。
野曠天高木葉疎，水清沙白鳥相呼。胡笳處處軍麾滿，鬼哭村村漢月孤。新亭
舉目山河異，故國傷神夢寐俱。黃菊欲開人卧病，可憐三逕已荒蕪。

聞禱衣

露下碧梧秋滿天，砧聲不斷思綿綿。北來風俗猶存古，南渡衣冠不及前。首肯
總肥宛騷裏，批杷曾泣漢嬋娟。人間俯仰成今古，何待他年始惘然。

登飛英塔

梯甍直上幾百尺俯視層空鳥背過千里湖山秋色淨萬家烟火夕陽多魚龍
袞袞危舟撒鴻雁冥冥避罔羅誰種山中千樹橘側身東望洞庭波

岳鄂王墓

鄂王墳上草離離秋日荒涼石獸危南渡君臣輕社稷中原父老望旌旗英雄
已死嗟何及天下中分遂不支莫向西湖歌此曲水光山色不勝悲

溪上

溪上東風吹柳花溪頭春水淨無沙白鷗自信無機事玄鳥猶知有歲華錦纜
牙檣非昨夢鳳笙龍管是誰家令人苦憶東陵子擬問田園學種瓜

次韵剛父無逸遊南山作

絕頂清秋凌翠烟登臨應費酒如川平生能著幾兩屐負郭何須二頃田初日
出雲光射地雙溪入湖波接天升高望遠我所愛青蹊有路何當緣

次韻子俊

歲云莫矣役車休蟋蟀在堂增客愁少年風月悲清夜故國山川入素秋佳菊
已開催節物扁舟欲買訪林邱從今放浪形骸外何處人間有悔尤

次韻本齋先生即事

重攬衣裘敞更寬，徂年欲暮氣先寒。雨中百草難為綠，霜後黃花尚耐看。千古清真耆舊傳，半生辛苦腐儒冠。便應築室山阿去，嘉與斯人賦考槃。

次韻信仲晚興

蕭蕭殘照晚當樓，寒葉疎雲亂客愁。歲月蹉跎星北指，乾坤浩蕩水東流。古來人物俱黃土，少日心情在一邱。獨立無言風滿袖，青山相對共悠悠。

次韻王時觀

相思吳越動經年，一見情深重惘然。草木變衰人易老，江湖牢落雁難前。秦山半出青天上，禹穴遙臨古道邊。欲說舊遊渾似夢，何時重上剡溪船。

錢塘懷古

東南都會帝王州，三月烟花非舊遊。故國金人泣，辭漢當年玉馬去。朝周湖山靡靡今猶在，江水悠悠只自流。千古興亡盡如此，春風麥秀使人愁。

次韻舜舉春日感興

沙頭春日已暄妍，細柳新蒲色共鮮。世事底須求分外，人生何物勝尊前。飛花

冉冉催華髮宿草青青失古阡回首舊歡如夢過不知今日是何年

紀舊遊

二月江南鶯亂飛百花滿樹柳依依落紅無數迷歌扇嫩綠多情妒舞衣金鴨
焚香川上暝畫船過鼓月中歸如今寂寞東風裏把酒無言對夕暉

次韻章得一同原父姪遊蘭澤

綠樹閣閣草接天已愁春盡更聞鶉落花飛絮都成恨痛飲狂歌渾欲顛起舞
有人如謝尚著書無意似伶玄繡筵寶瑟何時會割錦纏頭不計錢
見章得一詩白次其韻二首

水色清連日色黃梨花淡白柳花香即看時節催人事更覺春愁惱客腸無酒
難供陶令飲從人皆笑酈生狂城南風暖遊人少自在晴絲百尺長
片片飛花欲送春萋萋碧草正愁人黃蜂釀蜜經營急紫燕銜泥來去頻才似
茂陵非晚遇美如曲逆不長貧久知求富都無益但喜論詩若有神

奉和帥初雨中見贈

陰雨淒淒生夏寒故人望望惜清歡停雲底事能相阻后土何時可得乾無事

甘為犀首飲切雲聊著屈平冠閉門客散且高卧戶外泥深沒馬鞍
正坐清談與世違交情如子定應禘圖書跌宕心猶在裘馬清狂意已非黃鶴
未知何日返飢烏故作傍人飛溪南流水清如玉終擬歸休理釣磯

次韻帥初

吳越相望三十年相逢意氣共翩翩長歌白石徒為爾遠訪丹砂亦偶然海氣
昏昏雲拂地江風颯颯雨連天他時別後相思處欲問山陰雪後船

多景樓

層巔官閣幾時脩遠檻長江萬古流白露已零秋草綠斜陽雖好莫雲稠平南
籌策張華得治內人才葛亮優景物未窮登覽興角聲孤起甕城秋

東陽八詠樓

山城秋色淨朝暉極目登臨未擬歸羽士曾聞遼鶴語樓在寶婺觀觀中老道士能言諸父出處征
人又見塞鴻飛西流二水玻璃合南去千峰紫翠圍如此山川良不惡休文何
事不勝衣

金陵雨花臺遂至故人劉叔亮墓

雨花台上看晴空萬里風烟入望中人物車書南北混山川襟帶古今同昆蟲
未蟄霜先隕鳳鳥不鳴江自東綠髮劉伶綠醉死往尋荒塚醉西風

蛾眉亭

天門日湧大江來牛渚風生萬壑哀青眼故人攜酒共兩眉今日為君開蒼崖
直下蛟龍吼白浪橫空鷺鶴迴南眺青山懷李白沙頭官渡苦相催

時與劉伯宣尚書同

登

海上即事

白水青林引興多紅裙翠黛奈愁何底從莫醉兼朝醉聊復長歌更短歌輕燕
受風迎落絮老魚吹浪動新荷餘不溪上扁舟好何日歸休理釣蓑

贈周景遠田師孟

與子同客帝王州一日不見如三秋風高氣肅雁聲急天青日暖蛛絲遊籬下
黃花為誰好水邊紅樹令人愁世間萬事可撥遣日日痛飲醉即休

送李元讓赴行台治書侍御史

郎署聯班僅一秋旦同趨省莫同休豈惟官事奔忙共自覺吾儕氣味投驄馬

只今登憲府白鷗何日傍滄洲別離不似今朝惡南望令人生白頭

送劉天錫鎮守鄂州

將軍好武交敦書執戟多年衛帝居扈蹕慣騎天育馬分符真食武昌魚弓刀行色寒逾壯尊酒風流澹有餘江路梅花正堪折未應便向故人疎

送繆秀才教授真州

髯生別我將安適言向真州作教官但使清風生絳帳何妨朝日照空槃東園草木因人勝北固江山隔岸看才近中年已傷別可堪南望送歸鞍

送闔子靜廉訪浙西

翰林禁近逼青冥憲節乘驄出帝城海內文章歸渾厚浙西民物望澄清姑蘇落日荷花淨震澤秋風橘柚明憶向玉階承聖語早歸黃閣慰蒼生

次韻左轄相公

昔年間里自浮沉卽省那知遂有今老去馮唐堪底用愁來莊舄向誰吟上林柳色春猶淺西塞桃花水正深知已如今居鼎鼐不應長此泣南音

次韻左轄相公奉寄行臺中丞徐公

盡日沉迷簿領書何時重得賦閒居已無夢想懸金印豈有文章到石渠白髮
故人霜拍在黃塵遊子斷蓬如舊遊憶在吳興日自采谿毛膾白魚

送孟君復信州總管

君侯弱冠已專城未許甘終浪得名五馬人生真足貴一毫寵辱不須驚莫雲
去作江東夢秋雨無忘薊北情歌罷風前折楊柳離觴那忍為君傾

追輓宋漢臣副使

生世憐余後此公聞人說似涕無從一時文獻交游裏十載烟霞杖履中有子
能為先友記臨終方見古人風秋漪亭上殘陽色猶照先生醉後容

欽頌世祖皇帝聖德詩

東海西山壯帝居南船北馬聚皇都一時人物從天降萬里車書自古無秦漢
縱強多霸略晉唐雖美乏雄圖經天緯地規模遠代代神孫仰聖謨

送吳思可總管汀洲

七閩南去路崎嶇五馬承恩出帝都地氣喜聞今有雪民生益似昔無襦山城
酒美傾鸚鵡雨館春深聽鷓鴣他日相思應悵恨離筵不忍賦驪駒

李仲淵求其弟叔行萬竹亭詩為賦一首

聞君有弟多栽竹邀我題詩寄遠情翠碧飛來人政靜鳳凰鳴集實初成江波
倒影春雲合山月籠陰夜氣清我亦有亭深竹裏也思歸去聽秋聲

王氏節婦

夫婦人倫之大者夫死宜容有二天矧是簪纓嫺母訓故應詩禮得家傳何須
斷耳徒驚俗只是持身已自賢年少寡居今白髮為君重賦柏舟篇

和姚子敬韻

同學故人今已稀重嗟出處寸心違自知世事都無補其奈君恩未許歸滄洲
白鳥時時夢玉帶金魚念念非準擬明年乞身去一竿同理舊苔磯

趙子敬御史志養堂

志養堂前驄馬歸融融喜氣動庭闈能令將種為書種可是斑衣勝繡衣手樹
聚萱侵雪色心同寸草報春暉不須更上陳情表壽母康強世所稀

至元庚辰繇集賢出知濟南暫還吳興賦詩書懷

五年京國誤蒙恩乍到江南似夢魂雲影移時半山黑水痕新漲一溪渾宦途

久有曼容志婚娶終尋尚于言政為踈慵無補報非于高尚慕邱園
多病相如已倦遊思歸張翰况逢秋鱸魚蓴菜俱無恙鴻雁稻粱非所求空有
丹心依魏闕又攜十口過齊州閑身却羨沙頭鷺飛去飛來百自由

初到濟南

自笑平生少宦情龍鍾四十二專城青山歷歷空懷古流水泠泠盡著名官府
簿書何日了田園歸計有時成道逢黃髮驚相問只恐斯人是伏生

劉端父御史見和前詩次韻答之

少日君多隱道情微官猶喜得山城腹中洞視渾無物身外何因更有名忽憶
放船苕水去終期背郭草堂成故鄉一別三千里看見池塘草又生

次韻端父和鮮于伯幾所寄詩

畫舸西湖到處游別來飛夢到杭州百年底用憂千歲一日相思似幾秋苦憶
東南多勝事空吟西北有高樓只今賴有劉公幹時寫新詩解客愁

春日送廉訪監司赴都

春回北斗轉招搖使節迎春上九霄官道柔楊有生意私田細麥長新苗東風

河水冰初泮遲日沙堤雪易銷入覲彤廷元會畢衮衣留相聖明朝
送劉安道指揮副使還都兼寄李士弘學士

昔來雨雪正霏霏今去春鴻向北飛王事便應歌杖杜家人未用歎蚺蟻據鞍
橫槊軍威壯把酒論文雅志違為問瀛洲李學士相思何故信音稀

趵突泉

灤水發源天下無平地湧出白玉壺谷虛久恐元氣泄歲旱不愁東海枯雲霧
潤蒸華不注波濤聲震大明湖時來泉上濯塵土冰雪滿懷清興孤

繼鄭鵬南書懷

豈不懷歸苦未閑宦情羈思不成歡可能治郡如龔遂只合臨流似幼安棋局
懶從先處著醫方留取用時看夜來夢到蒼溪上一枕清風五月寒

驚秋

澤國西風一夜生故園喬木動秋聲山川滿目悲搖落物色無心得老成下坂
牛羊知故道親人魚鳥近幽情向來豪氣消磨盡空對年光浪自驚

德清閒居

已無新夢到清都空有高情學隱居貧尚典衣貧購畫病思棄研厭求書圍人
焚積夜防虎谿女叩扉朝賣魚困即枕書飢即飯謀生自笑一何疎

題山堂

手種青松一萬栽山堂留得翠屏隈推窗綠樹排簷入臨水紅桃對鏡開山雉
唯迎朝日去野禽啼傍夕陽來老妻亦有幽棲意數日遲留不肯回

醉後同張剛父清風樓聯句

碧樹未黃風露秋晚雲蕭索亂山愁趙千家疎雨催砧杵兩岸殘陽入釣舟張

畫角吹殘人罷市清尊飲散客登樓趙古今回首俱陳迹惟有溪聲日夜流張

和鄧善之九月雪

季秋驚見燕山雪遠客淹留愁病身顛顛自傷黃菊晚橫斜空憶野梅春蒼松
翠柏爭擎重紺殿紅樓迥絕塵想得江南猶未冷嫩橙清酒正嘗新

次韻于敬懷王子慶往吳中王力購

闔閭城郭填姑蘇弔古登臺百感俱秋水遠隨鴻影沒江雲長傍客帆孤吳時
花草于今在晉代風流絕世無別後古人須有得已應懷寶問歸途